

弘

簡

錄

弘簡錄卷八十八

天王 宋一之四

仁宗皇帝諱禎初名受益真宗第六子母妃李氏以大中祥符三年四月十四日生劉皇后養以爲子自幼天性仁孝寬裕喜慍不形於色七年封慶國公八年封壽春郡王講學于資善堂天禧二年宴宗室及壽春王府官屬於資善堂賜恤民歌加爵太保兼中書令進封昇王八月甲辰議立爲皇太子九月丁卯受開癸酉謁太廟大赦加恩宗室羣臣賜勲一轉作元良箴以賜四年詔自今除軍國大事仍舊親決餘皆委皇太子五日一開資善堂太子秉笏南鄉立聽輔臣叅決諸司事十二月乙酉

皇太子始親政詔內臣傳旨覆奏庚寅命張景宗侍左右卽位  
之明日己未大赦除常所不原百官進階一等庚申命丁謂爲  
山陵使供應諸費毋賦於民優賞諸軍出遺留物以賜近臣宗  
室及主兵官并遣契丹甲子見羣臣于崇政殿西廡乙丑以生  
日爲乾元節丙寅遣使契丹告哀并告卽位三月乙酉作受命  
寶庚寅初御崇德殿太后設幄次于永明殿垂簾以見輔臣夏  
六月己酉命叅政王曾按視山陵皇堂丁巳契丹屢使祭奠弔  
慰庚申雷允恭坐擅移皇堂伏誅丁謂有罪罷甲子改馮拯山  
陵使秋七月乙亥遣使契丹報謝八月壬寅遣賀契丹主生辰  
正旦乙巳帝與太后同御永明殿決事九月壬申告大行皇帝  
謚于天地宗廟社稷癸酉上謚冊于延慶殿冬十月壬寅契丹  
使來賀卽位己未祔于太廟廟樂曰大明之舞配以莊穆皇后

十一月辛巳初御崇政殿西開聽侍講孫奭馮元講論語是歲  
蘇州水滄州海潮溢詔振卹南平王李公蘊遣使進貢吻斯羅  
立遵求內附

天聖元年春正月丙寅朔改元時承先帝之後兵濫吏冗齋醮  
盛行兼之外夸耗蠹上下益困於財三司使李諮判官俞獻卿  
請與大臣議抹正之上納其言癸未立計置司以張士遜呂夷  
簡魯宗道領之乙酉停禮儀院減諸節齋醮道場罷江寧府溧  
水縣采丹砂彭州九隴縣采金禁毀錢錢鍾除戎澶州虛估稅  
錢蠲天下逋負詔自今營造務節浮費三司度實給川罷榷茶  
行貼射法計淮南十三場買賣本息一切定爲中估罷官給本  
錢使商人鬪戶自相交易而官收其息給券爲驗以防私售三  
月甲戌奉安其宗御容于西京應天院景靈宮奉眞殿昭應宮

安聖殿并洪福院鴻慶宮慈孝寺崇真殿賜民八十以上茶帛  
併復其家辛卯司天監上崇天曆夏四月丁未乾元節百官及  
契丹使上壽于崇德殿詔文武官奏蔭親屬各從本資丁巳詔  
近臣舉常叅官充臺諫禮部行貢舉刑部錄繫囚諸州配囚錄  
具獄與地里上刑部詳覆五月甲子陝西河北行中劄樞見錢

法

語見李  
諡傳

甲戌命魯宗道按視滑州決河募民輸芟塞之秋八

月丙申德音減天下囚罪一等杖以下釋之罷廣南進興花磨  
鄆州東平馬監以牧地賦民徙陝西緣邊軍馬屯內地甲寅芝  
生天安殿在閏九月甲午詔裁造院女工及營婦配南北作坊  
者並釋之丁巳禁伎術官求輔臣宗室薦舉冬十一月禁江浙  
荆湖間廣邪巫挾術害人戊午置益州交子務從運使薛田張  
若谷之請以百二十五萬六千三百緡爲額禁私造 二年春

三月癸卯上真宗實錄甲辰廷試進士賜宋郊葉清臣鄭戩以下諸科凡四百八十五人及第出身有差夏四月辛酉詔三司歲市紬絹非土產者罷之及罷天慶天祺天貺先天降聖等節宮觀然燈秋八月丙辰朔宴崇德殿初用樂之半己卯幸國子監謁孔子退召直講馬龜符講論語遂幸武成王廟十一月甲午加上真宗諡乙未朝饗玉清昭應景靈宮丙申饗太廟丁酉合祀圜丘令禮官草儀先於宮中習之戊戌率百官上皇太后尊號禮畢羣臣上尊號曰聖文睿武仁明孝德皇帝大赦賜百官諸軍加等乙巳立皇后郭氏十二月庚午詔開封府每歲正旦冬至禁刑三日三年夏四月丁丑詔三館繕書藏太清樓五月癸巳幸御莊觀民刈麥問民舍有機杼聲遣人賜織婦茶帛六月壬戌太白晝見詔司天監據占書以聞癸酉涇原屬羌

寇邊都監趙士隆等死之遣使體量安撫陝西冬十月乙卯太白犯南斗十二月戊寅太白復見四年夏四月乾元節知寧州楊及獻繡佛上謂輔臣民安政舉乃守臣之職焉用此爲詔還之又減川陝歲輸錦綺易綾紗爲絹以給邊費五月壬午判刑部燕肅言唐決死刑在京五覆奏在外三覆奏故貞觀開元以來斷死罪少者二十九多者五十八以今較之斷大辟二千四百有奇視唐幾至百倍望准故事疑者皆得覆奏有司毋輒舉取有不當識者官吏不坐從之經筵上語輔臣曰軍國用度秋毫皆出民力朕極意愛惜於宮室臺池尤重興作宮闈之內累加告戒俾從儉約近籍後宮所儲金帛二十餘萬金賜三司以贍軍實閏月戊申定江淮歲漕米額爲六百萬石凡減五十萬除舒州太湖等茶場民通錢十三萬緡辛亥復陝西永豐渠

以通解鹽六月庚寅京師大雨澍電平地水數尺辛卯避殿減膳降天下囚罪一等徒以下釋之蠲歲內京東西淮南河北被水民租官物漂失免償所在存撫流徙秋七月壬申詔選經術諸路轉運舉所部官近臣舉京朝官士有文而行不副不得薦送九月乙卯詔禮部貢院諸科通三經以上薦擢之詔錄周世宗從孫柴元亨爲三班奉職凡經郊祀錄其子孫冬十月甲戌朔日食甲午昏霧四塞十二月丁丑發米六十萬斛貸畿內饑五年春正月壬寅朔率百官上皇太后壽于會慶殿遂御天安殿受朝二月癸酉命王曾提舉呂夷簡夏竦脩先朝國史及詳定編敕三月戊申賜進士王堯臣等三百七十餘人秦州地震龍環廣諸州歲貢毒瑁鼈皮紫貝及溫州柑并密煎果實夏四月壬辰壽寧觀火五月壬寅太白晝見京畿旱六月甲戌祈雨



丙子決畿內繫囚罷諸營造之不急者丁丑雨秋七月丙辰發  
丁夫三萬八千卒二萬一千給錢五十萬塞滑州決河平之九  
月庚戌閱龍衛神勇軍習戰及諸州騎射冬十月辛未罷陝西  
青苗錢己丑頒新定五服敕甲午同皇太后幸御書院觀太宗  
真宗御書十一月辛亥朝饗景靈宮壬子饗太廟癸丑合祀圜  
丘大赦賀皇太后于會慶殿自後三歲一行加恩百官輔臣恩  
例外更改一子官是歲京東秦州水災同華州旱陝西河北邢  
洺州蝗磁州蟲食桑華州蟲食苗遣使賑恤蠲其租 六年春  
二月庚辰大風晝晦三月丙申朔日食壬戌作西太一宮帝建  
祀之夏四月戊辰詔審官三班院吏部流內銓軍頭司各引對  
所理公事帝自爲太子輔臣叅決諸司事至是始還有司申申  
旦有星大如斗自北流至西南光燭地有聲如雷帝齋居不視

萬以助之冬十月庚子黃白氣五貫紫微垣十一月甲戌脩內  
功成恭謝天地謁太廟大赦改元百官進秩優賞諸軍十二月  
壬戌西北有蒼白氣亘天是歲京東淮南江東旱漢陽軍饑遣  
使錄囚發廩賑貸趙德明死子元昊嗣二年春二月戊戌字  
山東北丁未祀先農于東郊躬耕籍田大赦百官上尊號曰睿  
聖文武體天法道仁明孝德皇帝加恩百官三月甲午皇太后  
崩以呂夷簡爲山陵使夏四月戊申帝始親政見羣臣于崇政  
殿西廂罷乾元節上壽及脩剎寺觀戒臣僚宗戚命婦毋得因  
貢獻通表禁中以祈恩澤凡傳宣內批有司未得卽行必審取  
處分由是僥倖者皆見裁抑中外悅之癸丑召還宋綬范仲淹  
諸臣丙辰以交通請謁黜內侍羅崇勲江德明等己未呂夷簡  
張耒夏竦陳堯佐范雍趙稹晏殊錢惟演皆罷以張士遜爲山

陵使李廸同平章事壬戌御紫宸殿追尊生母李氏爲皇太后  
謚曰莊懿遣使告哀契丹以士遜兼園陵使五使並兼莊懿后  
職六月甲午朔日食秋七月戊子蝗旱告于天地宗廟讓尊號  
睿聖文武四字仍令中外直言闕政八月增知耀州富平縣張  
龜年秩令再任以其治行風告天下契丹使來弔慰祭奠丁巳  
除宋綬端明殿學士位翰林學士上以待學士之久次者冬十  
月丁酉祔葬二后于宋定陵免應奉民戶租賦科役有差作奉  
慈廟並祔神主除后父諱戊午帝以張士遜楊崇勛等不能有  
所建明懼之頗思夷簡復以爲平章事帝守祖宗法臺官必由  
中擢每言若臺官由宰相自用苟有過失何人敢言十二月丁  
未詔臺官非中丞知雜保薦毋得敷授戊申出宮女二百人乙  
卯廢郭后爲淨妃敕有司毋受臺諫章奏中丞孔道輔率諫官

孫祖德范仲淹朱庠劉渙御史蔣堂郭勣楊偕馬絳段少連十  
人大呼殿門請對帝用呂夷簡奏出道輔仲淹於外罰祖德等  
金仍詔自今毋得相率請對丁巳改明年元是歲畿內京東西  
河北河東陝西蝗遣使安撫出內藏絹以代歲輸并除民租淮  
南江東兩川饑詔發運使以上供米百萬斛賑之

景祐元年春正月丁亥置崇政殿說書以賈昌朝趙希言王宗  
道楊安國爲之曰令二人入侍講說昌朝於訓詁不爲曲解至  
先王治心脩身經理天下之意指物引喻毫縷解析上慨然贊  
之因請記錄付史館從之夏四月癸丑詔置殿中侍御史監察  
御史重行凡臺諫未歷郡守者與郡六月上御崇政殿策制舉  
賢良方正太常博士紳才識兼茂大理寺丞吳育茂材異等進  
士張方平各試六論並入等秋八月壬戌字出張翼甲子月與

災惑犯南斗大赦避殿減膳戊辰帝不豫累日不進食輔臣奏  
事延和殿閣中外憂懼楊太后安置尚楊二美人於別宅九月  
帝康豫壬辰請隻日御前殿如故事丁酉復常膳十一月己丑  
冊立曹氏爲皇后祕書丞余靖請終莊獻喪制而後行不報是  
歲淮水溢河決澶州橫隴埽停江淮漕米二百萬石振東京饑  
出內帑絹代淮南歲輸作粥食開封府諸縣界及災傷諸州軍  
免夏稅全半各有差及賑恤麟府蕃漢軍民元昊犯邊交州以  
六百內附 二年春正月癸丑置通英延義二閣寫尚書無逸  
篇于屏二月育宗室汝南郡王允讓子宗實于宮中時承平日  
久上留意禮樂之事命集賢校理李照重定雅樂上御延福宮  
臨閣奏郊廟景安興安祐安五十一曲聖祖廟大安之曲自燕  
肅倡議乞以王朴所造律準考定樂器言人人殊照言律準視

古樂高五律祝禁坊樂高二律乃更造新器而聲極下議者非  
之詔天下有深達鐘律者所在以聞知杭州鄒向薦推官阮逸  
范仲淹薦布衣胡瑗二人盛言照樂穿鑿復命改作瑗以橫黍  
累尺及成圖徑與古不合上納韓琦言詔太常仍用和峴所定  
樂夏五月庚子議太祖太宗真宗廟並萬世不遷南郊升侑上  
帝以太祖定配二宗迭配秋七月上念皇族散處都城詔用昭  
應宮舊地作睦親宅以處之八月甲寅宴紫宸殿初用樂冬十  
一月乙未南郊大赦上尊號曰景祐體天法道欽文聰武聖神  
孝德皇帝加恩百官錄五代及諸國後十二月壬子大敗趙元  
昊于河湟是歲出內庫珠賜三司以助經費雷化鎮寧蠻入寇  
詔桂廣會兵討降之置提點刑獄鑄錢官復羣牧制置使三  
年春三月癸巳復貼射茶法李諮執政請復行見錢命商持券

徑趨樵貨務驗實立償之縣官自此省費夏五月庚辰出權知  
開封府范仲淹責以離間引用朋黨仍嘗朝堂不許越職言事  
六月壬申虔吉州水溢壞城郭廬舍賜被溺家錢有差秋七月  
乙未置大宗正司以宗室允讓領之庚子大雨震電太平興國  
寺災移太祖御容奉安于揚州建隆寺八月己酉頒民間冠服  
居室車馬器用犯制之禁定心喪解官法九月庚辰幸睦親宅  
宴宗室冬十月丁未命章得象等考諸路提刑課績甲寅作朝  
集院以待朝士外官還京者十一月戊寅保慶皇太后楊氏崩  
四年春二月乙丑置赤帝像于宮中新嗣三月甲戌置天章  
閣侍講夏四月乙巳呂夷簡上景祐法寶新錄五月庚戌皇子  
生未踰月薨六月戊子出神武祕畧賜邊臣秋七月戊申有星  
數百西南流至璧東大者光燭地黑氣長丈餘出畢宿下是歲

三京旱越州水杭潮壞堤并代忻地震裂泉涌火出如黑沙狀連年不止吏民畜壓死數多遣使致祭決繫囚撫存其民賜溺傷家錢有差

寶元元年春正月甲辰雷詔求直言大理評事蘇舜欽上言願脩己以御人洗心以鑒物動聽斷捨燕安放棄優譖近習之輩人親近剛明直言之良士因此災變以思永固天下幸甚二月壬申復日御前殿三月戊戌朔親試進士題以富民之要在節儉呂溱賦曰國用既足民財乃豐故此富民之要事歸節儉之中上覽而悅之擢爲第一凡諸科及第出身合七百二十四人甲申以水旱爲憂詔天下諸州月上雨雪狀秋七月壬戌策制舉著作郎田况大理寺丞張方平冬十月丙寅詔戒百官朋黨十一月戊寅郊大赦改元增爵號寶元二字餘如故十二月甲



子京師地震丙寅趙元昊反命夏竦范雍委以經畧之任是歲  
連與建州大水遣使賑恤復淮南江新荆湖制置發運使安化  
蠻寇宜融州發邵澧潭三州兵及廣西鈐轄進討平之二年  
春正月癸丑趙元昊表請稱帝改元三月丁未鑄皇宋通寶錢  
夏四月癸亥遣使體量陝西河東募民入粟出內庫珠易緡錢  
三十萬糴邊儲五月癸巳詔近臣舉方畧材武之士各二人六  
月壬戌詔近臣同三司議浮費自乘輿服御及宮掖所須宜從  
簡約其吏兵祿賜不在減例壬午削元昊官爵賜姓禁邊人與  
互市秋七月戊午加夏竦范雍涇原鄜延兩路馬步軍都總管  
八月皇子生賜名旂爲忠正軍節度使封壽國公三歲薨九月  
壬寅詔陝西河北轉運并總管皆兼都大制置營田屯田事十  
一月夏人寇保安軍巡檢指揮使狄青擊敗之上聞欲召見命

圖其形以進是歲曹濮單州蝗兩川饑民出關勿禁內出銀四萬兩易粟賑之迎賜陝西緣邊及麟府軍士緡錢

康定元年春正月丙辰朔日食除越職言事之禁時西事日擾詔樞密院宰相執政同議邊事諸路轉運并按察官舉才堪將帥及熟知邊事者以聞元昊寇延州執總管劉平石元孫都監黃德和坐棄軍腰斬范仲淹奏今邊城及關中之備十無二三若賊乘虛深入東阻潼關隔兩川貢賦朝廷不得高枕矣乃遣使問陝西河北強壯增置軍籍括畿內京東西淮南陝西馬出內庫珠以償其直詔陝西運使明鎬潼關設備募強壯以備邊出內藏緡錢十萬賜戍邊禁兵及戰死之家辛卯月與太白俱犯昂有白氣如繩貫日詔改元讓尊號寶元二字許中外臣庶上章言事丙午降德音給延州保安軍戰沒子孫月糧寇所經

州縣釋流以下罪併除今年夏稅又量陝西民力蠲所科芻糧  
及河東所科粟三月丙辰詔大臣條陝西攻守策知制誥韓琦  
論西師形勢甚悉命安撫陝西因薦知越州范仲淹卽以知永  
興軍丙子大風晝晦是夜有黑氣長數丈見東南詔言闕政戊  
寅賜京師河北陝西河東諸軍緡錢增各路弓箭手省陝西沿  
邊堡砦諸戍邊軍月遣內侍存問其家致醫藥歛葬之費夏四  
月辛亥築延州金明栲栳砦五月甲寅朔詔前殿奏事無過五  
班餘對後殿又詔假日御崇政殿視事如前殿命大官賜食壬  
戌張士遜致仕復用呂夷簡平章事癸酉詔夏守贊等赴闕代  
以夏竦琦與仲淹副之元昊陷塞門安遠諸砦兵馬監押王繼  
元死之六月乙未南京鴻慶宮神御殿火遣使安撫秋七月乙  
丑遣郭禎使契丹劉渙間道使唃廝囉告助討夏人八月辛亥

詔仲淹兼領延州用葛懷敏領兵驅逐塞門等砦蕃騎出境仍募弓箭手給地居之命鄜州將种世衡築青澗城戊午元昊寇三川砦都巡檢楊保吉死之又圍師子定川堡戰士死者五千餘人遂陷乾溝乾河趙福三堡韓琦命環慶路兵馬副都總管任福破白豹城冬十月乙未製訓兵銅木契傳信牌十一月壬戌有大星流西南聲如雷者三是歲連閱諸軍習戰使臣諸班有武藝者自陳錄方畧士六十一人授官有差出內藏官錢八十萬絹一百萬又發常平緡錢糴軍儲鑄當十錢助邊費

慶曆元年春正月元昊僞遣人請和上諭輔臣賊多詭計欲懈我師宜詔諸路益嚴備禦二月丙午京師雨藥元昊寇渭州任福敗于好水川及將佐軍士死者六千餘人奏至帝震悼爲之盱食於是韓琦范仲淹夏竦皆罷夏四月以陳執中爲經畧安

撫招討等使秋七月丙辰月掩心後星戊午掩南斗八月庚子  
又掩歲星賊寇麟府州折繼閔敗之詔鄜延以兵赴援入破寧  
遠砦砦主王世宣兵馬監押王顯死之陷豐州知州王餘慶兵  
馬監押孫吉死之冬十月甲午分陝西爲四路復以琦知秦州  
仲淹知慶州龐籍知延州王沿知渭州皆兼本路經畧安撫招  
討使諫院張方平言涇原最當賊衝沿未愜人望不當與琦等  
同列不報琦請於鄜慶渭三州各益兵三萬拔用勇畧將帥統  
領訓練但西賊舉動先據要害觀利整陣併力擊之若其未集  
淺入大掠破其和市招降種落二三年間賊力漸屈平定有期  
矣十一月司天監上崇天萬年曆遂因丙寅郊祀改元慶曆大  
赦從張方平請勅邊吏通其善意於夏元昊請降是歲募京東  
西淮浙江南荆湖強壯置宣毅及萬勝軍凡二十指揮陝西置

饒塞軍出內帑緡錢一百萬命江東及江饒池三州鑄大錢錢以備邊費詔近臣舉河北陝西河東通判縣令臣僚受外任毋得臨遣所恩募民間材勇補神捷指揮二年春正月上以西邊用兵凡羽毛筋角膠漆鐵炭瓦木之類一切募入償之猾商貪吏物估益重鹽益賤販者不行詔復諸路榷鹽法凡商人處估受券及已受鹽未鬻者皆計直輸官錢丁巳范仲淹上和戰二議訓臣前守越州歲納稅緡三十萬備以喫戎是費一郡之人而息天下之爭也詔下四路參議二月乙未詔刺河北強壯子弟爲義勇軍自澶淵盟後契丹通好三十有九年其臣因元昊叛教以乘輿取關南十縣三月巳巳遣蕭英劉六符來聘書稱元昊甥舅之國何不遣一介爲報及以營長堤塞要路開決塘水添置邊軍爲言且引重兵壓境帝發示輔臣擇報聘者夏

四月庚辰遣知制誥富弼副使張茂實往聘報誓言元昊逆謀  
狂僭向議討除已常聞達其築堤開陂益繕防淫滌滌集點兵夫  
亦邊臣常職彼此何疑是月賜進士楊璠等四百餘人時契丹  
徵兵大集朝廷恐其南下益爲守備從呂夷簡言五月戊午建  
大名府爲北京以程琳知府事又分京東西爲兩路以陳執中  
知青州張觀知鄆州兼領安撫使六月以王德用判定州兼三  
路都部署契丹聞之以爲漢兵將大入復有議和之意秋七  
弼至契丹與其主面相諭難力拒割地之請契丹頗悟弼以上  
意祇許增幣契丹復欲求婚弼具還白癸亥再命與茂實持和  
親增幣二議及誓書往既至契丹不復議婚專欲增幣歲以銀  
絹各十萬疋兩送至白溝晏殊會議其名爲納八月丁丑策制  
舉錢明逸入等甲申白氣貫北斗九月乙丑契丹遣北院副使

耶律仁先持誓書來帝遣知制誥梁迥報之南北通好如故閏  
月元昊寇鎮戎軍副總管葛懷敏會兵禦之次于定州師潰敗  
績懷敏及諸將死者十四人中丞賈昌朝上疏近歲驟擇將領  
士不練習以屢易之將取不練之士故戰則必敗況今武臣多  
出親舊恩倖素不知兵一旦付以千萬人之命是驅之死地請  
自今命將之時去疑貳推恩惠務實效使一切便宜從事上  
嘉納之冬十月戊午詔發定州禁軍二萬二千人屯涇原仍錄  
陣亡將校無子孫者續之妻女無依者養之十一月壬申黑氣  
以北斗柄辛巳復罷四路置陝路安撫經畧招討使置司涇州  
琦與仲淹龐籍合秦鳳環慶四路之兵掎角而進以成首尾之  
勢各賜錢百萬三年春正月庚午朔皇子曦生一日而天辛  
巳詔輔臣議獨天下賦役辛卯置德順軍於渭州龍竿城癸巳



元昊更名曩霄遣人納款自稱夏國男遣保安軍判官邵良佐使之許冊爲夏國王歲賜絹十萬匹米三萬斤二月辛酉立四門學時賢臣蒙進章得象晏殊並兼樞密使賈昌朝參知政事杜衍韓琦范仲淹並爲樞密副使復增置諫員以蔡襄歐陽脩王素知諫院余靖爲右正言國子直講石介大喜作慶曆盛德詩五月丁卯朔日食自春不雨至於是月帝齋心密禱戊子雨輔臣稱賀語載弘道錄忻州地大震虎翼卒王倫隨叛旋獲之秋八月丁未帝開天章閣召參知政事范仲淹樞密副使富弼給以筆札使書所欲爲退而惶恐語人曰上用我至矣事有先後久安之弊非朝夕可革也各條上十事悉採用之壬子有白氣貫北斗魁甲寅太白晝見冬十月丙午從輔臣等言詔兩府同選諸路都轉運皆兼按察使以沈遼等爲之壬戌頒新定磨勘式

內外臣僚非有勲德善狀不得非時干進其無私罪而有監司  
及清望官五人保任方得磨勘遷秩其法始密于舊矣十一月  
丁亥復更定陞子法凡聖節南郊推恩子孫必年過十五二十  
方許選任其恩亦殺十二月河北降赤雪司天監奏五星同出  
東方主中國大安 四年春正月帝御經筵納直講趙師民言  
復命曾公亮等講讀經史語之曰卿等宿儒博學多所發明朕  
未常厭倦但恐卿等勞耳二月己酉白虹貫日三月乙亥詔天  
下州縣立學并定選舉法初仲淹意欲敦實行復古勸學令近  
臣議宋祁等奏教不本於學校士不察於鄉里則不能以取名  
實有司束以弊病學者專於記誦又何以盡人材其若先設學  
校以教之然後察其行履帝從之令諸道使者選屬官爲教授  
不足取於鄉里宿學有道業者三場先策次論次賦詩通考爲

去取罷帖經墨義士有通經願對大義者聽已卯御通英閣上  
出御書十有三軸曰循祖宗法率真考業以及辨明比斥讒佞  
察忠僿鑒迎合罪已爲民捐躬撫軍凡三十五事願丁慶等曰  
朕觀書之暇取臣僚上言或進對事目可施於政治者書以分  
賜卿等曾公亮王洙等拜賜取其大體重者付兩府施行之時  
取才養士法極盛而國監纔二百楹制度狹小不足以容判監  
事王拱辰以爲言四月壬子詔改錫慶院爲太學五月壬申車  
駕臨幸謁孔子舊止肅揖帝特加拜禮賜直講孫復五品服命  
取胡瑗科條立爲令式乙酉忻州地震有聲如雷丙戌彗掃道  
人上表稱臣朝廷欲遂納之適與契丹構隙招誘邊戶失勇男  
之權契丹仍請拒絕其使張方平議恐一舉而失二國乃賜瑗  
幣詔書朝廷納卿誠款本緣契丹之請今卿宜自審處但嫌隙

朝除則封冊暮行矣時仲淹與弼困於讒間不慚而懼各請行  
邊六月以仲淹宣撫陝西河東弼宣撫河北二人既出帝心不  
能無疑弼又勸帝宗室封王者少北朝率以近親爲名王將相  
以治國事掌兵柄願陛下擇宗室賢者數人封之內以藩屏王  
室外以威示四裔秋七月戊寅封延美子德文爲東平王元份  
子允讓爲汝南王德昭孫從藹爲須國公德芳孫從照爲安國  
公同時受爵凡十人冬十一月壬午郊大赦十二月乙未封曩  
霄爲夏國王五年春正月甲戌罷河東陝西諸路招討韓琦  
上言大憂者三一羌人雖暫稱臣歲邀厚賂若使其國充實我  
邊弛備其勢必窺關輔二契丹西討不得志見朝廷封冊心必  
不樂或聚盟誓三歲遣契丹夏國合七十五萬取民如此忽有  
水旱之擾患生腹心若二敵爭兵未已我能練將畜財坐待困

幾而後圖之此實一大利也四路兵備實不可弛請遷近臣主  
之委以久任上納其言出范仲淹知邠州杜衍與陳執中異議  
時諫員正闕又罷孫甫衍欲奏留供職執中不肯署劄衍取焚  
之因譖罷衍正言錢明逸希意言弼更張綱紀紛擾國經亦罷  
時衍在位方及一百二十日弼自河北還甫及國門琦勢難獨  
留疏言臣僚專務攻擊取快私忿非國家之福疏入不報懇求  
補外亦罷歐陽修自河北上疏降知滁州而磨勘蔭子轉運按  
察及選舉新法俱廢矣三月庚午東方有黃氣如虹貫月夏四  
月丁亥朔日當食陰晦不見是歲廣州荆南岳州地震 六年  
春三月辛巳朔日食登州地震屢震峽嶠山摧海底有聲如雷甲  
午月犯歲星是月賜進士賈黯等五百三十八人夏五月甲申  
京師雨雹地震丁巳有流星出營室南有光燭地隱然有聲秋

七月丁亥月犯南斗八月癸亥策試制舉太常博士錢彥遠入  
等七年春三月旱避殿減膳許中外臣僚直言闕失降宰相  
官一等貽月復之冬十月河陽許州地震十一月戊戌郊大赦  
貝州宣毅卒王則據城反明鎬討之不克八年春正月丁丑  
命文彥博宣撫河北許便宜從事閏月執王則檻送京師命磔  
于市改貝州爲恩州始析大名河北真定高陽四路各置帥更  
命儒臣以遠邊戊申賞功彥博同中書門下平章事官吏將士  
遷擢有差三月詔羣臣言時政侍御史何刻言國家設侍從官  
選學士以至待制皆以備顧問頃來惟待以文翰而不責其言  
諸臣亦自安循默至天下大利害惟以責備臺諫其官僅十員  
欲致陛下聰明無所遺政事無所失不可得矣甲寅帝幸龍圖  
天章閣詔輔臣學士以下中丞以上皆給筆札令卽坐條對翰

林張方平進汰冗兵退剩員慎磨勘擇將相四事又進備邊恤刑二事其兵農要務財賦利害錢法是非與夫譏人害政姦盜亂俗古今治亂之策只在上下之勢離合而已上嘉納之夏四月曩霄死告哀封其子諒祚爲夏國王六月丙子河決涇州商胡埽京東西河北水災秋七月罷常宴募饑民爲軍出內藏錢帛賜三司貨粟併以今年江淮漕米轉給被災州軍流民所趨官爲舍止之冬十一月己亥作皇帝欽崇國祀之寶十二月乙丑朔以災傷改明年元減天下囚罪一等徒以下釋之丁卯冊美人張氏爲貴妃

皇祐元年春正月朔日食停作樂罷上元張燈己未詔發緡錢二十萬市穀種分給河北貧民疫者遣使頒藥二月彗星見辛未發禁兵赴京東西路備盜三月賜進士馮京等四百九十八

人夏五月帝幸後苑觀刈麥六月甲子薊河北復業民租賦二年甲戌始置觀文殿大學士以賈昌朝爲之八月甲申策制舉殿中丞吳奎冬十月汰諸路兵二年春二月甲申出內庫絹百萬下河北陝西河東糴軍儲五十萬以備軍賞三月戊子朔詔季秋有事于明堂卽大慶殿行禮自太祖以來惟命有司攝事至是始親享焉夏五月丁亥朔作禮神玉六月己未以新製明堂樂八曲并自製黃鐘五音五曲僉錄于太常九月丁亥罷雅樂已酉朝饗景靈宮庚戌饗太廟辛亥大饗天地于明堂以太祖太宗眞宗配如園丘大赦百官進秩一等冬十月乙亥宴京畿父老于錫慶院閏十一月丙寅秀州地震有聲如雷丁卯詔兩省兩制及太常詳定大樂知制誥王洙言舊樂宮小而商大是君弱臣強之象命與致仕胡瑗置局于祕閣參酌制度更



造鐘磬上之其法下李照一律然黃鐘律短所奏樂音高議者  
以爲皆不合古久而不定乃會諸臣作鐘律以獻而郊廟仍用  
舊樂 三年夏六月丁亥知無爲軍茹孝標獻芝草命免其罪  
戒自今州郡勿復進獻語載弘道錄 秋七月辛酉河決大明府郭固  
口八月汴河絕流丙戌遣使安撫京東淮南兩浙荆湖江南七  
路饑民時張貴妃寵冠後庭伯父張堯佐驟除宣徽節度景靈  
羣牧四使侍御史唐介與知諫院包拯吳奎等力爭之中丞王  
舉正留百官班廷論罷其宣徽景靈二使冬十月堯佐復除宣  
徽使知河陽唐介抗言其事并劾文彥博貶爲英州別駕庚子  
彥博亦罷十一月益州鄉貢士房庶著樂書補亡二卷以爲嘗  
得古本漢志云度起於黃鐘之長以子穀秬黍中者一黍之起  
積一千二百黍之廣度之九十分黃鐘之長一爲一分今文脫

之起積一千二百黍八字故誤以一黍爲一分其法非是當以  
秬黍中者一千二百實管中黍盡得九十分爲黃鍾之長九寸  
加一爲尺則律定矣直祕閣范鎮是之時胡瑗等製樂已定故  
授以校書郎而遣之 四年春正月乙亥塞大名決河廣源州  
蠻儂智高反陷邕橫貴藤梧康端龔潯九州進圍廣州秋七月  
庚午從龐籍言命狄青往討之諸軍皆受節度冬十月丁丑賊  
陷賓州甲申復入邕州十一月壬寅朔日食十二月壬申朔青  
進次賓州執敗將陳晤并指使袁用等斬以徇軍聲大振 五  
年春正月庚戌白虹貫日戊午青夜渡崑崙關大敗儂衆于邕  
州斬首五千餘級智高走大里廣南平捷至帝喜曰青之功籍  
之力也甲子遣使撫問廣南將校賜軍士緡錢二月癸未召青  
還朝以余靖經制廣西追捕智高三月賜進士鄭獬等五百

二十人夏五月賞廣南功拜青樞密使孫沔爲副使八月辛酉  
策制舉趙彥旋又黜之冬十月丙申朔日食壬子作鎮國神寶  
十一月乙巳郊以三聖並配大赦

至和元年春正月京師大疫上出犀二株付太醫局和藥其一  
乃通天犀內侍李舜舉請留上曰與其用爲帶孰若以療民病  
乎立命碎之癸酉貴妃張氏薨追冊爲皇后諡溫成二月乙亥  
太史言日當食四月朔帝易服避殿減膳用牲于社庚辰下德  
音改元減死罪一等流以下釋之五月壬辰太白連晝見各星  
晨出東方守天關秋七月丁卯立溫成園己巳御史馬遵呂景  
初吳中復孫沔以論溫成皆出之八月丙午以劉沆同平章事  
冬十月丁酉葬溫成后祔主于廟 二年春三月丁卯詔經筵  
起居注立於講讀官之次丙子收封孔子後世恩爲衍聖公夏

四月契丹賀乾元節使以其主命持本國三世畫像來求御容  
六月戊戌文彥博富弼復相乙巳儂智高母及弟智光子繼宗  
繼封咸伏誅秋九月戊午契丹主宗真祖帝爲發哀成服于內  
東門幕次遣使祭奠弔慰及賀其子洪基嗣立冬十二月丁亥  
詔李仲昌修六塔河庚戌太白晝見壬子作醴泉觀

嘉祐元年春正月甲寅朔御大慶殿受朝上暴感風眩翌日輔  
臣彥博等問疾因留禱祀于大慶殿齋宿殿廡命近臣禱于寺  
觀及遣詣州長吏禱嶽瀆詣祠二月甲辰帝疾愈御延和殿彥  
博請召還知諫院唐介三月辛未客星沒壬申遣官告謝天地  
宗廟社稷寺觀詣祠閏月癸未朔詔前後殿間日視事夏四月  
壬子朔大雨水淫安上門折其門關壞官私廬舍數萬區六塔  
河復決流仲昌于英州諸路江河決溢河北尤甚六月罷回河

役遣使安撫出內藏銀絹三十萬并麥種賑貸命監司分行水  
災壓溺死者賜錢有差乙亥雨壞太社太稷壇詔羣臣言時政  
闕失知諫院范鎮請立儲嗣章凡十九上學士段陽修知制誥  
劉敞皆以爲言帝不聽己丑月入南斗彗出紫微垣長丈餘八  
月庚戌朔日食癸亥彗滅九月庚寅命宰臣攝事于太廟辛卯  
以疾平恭謝天地于大慶殿大赦改元加恩百官十二月甲子  
白虹貫日二年春二月雄霸州河北幽州地震遣使安撫三  
月賜進士章衡等三百八十人知貢舉段陽脩大變文體出澆  
薄之士夏五月己亥詔舉行磨勘法命孫抃張昇稽轉運使及  
提點刑獄課績秋八月壬子命富弼等詳定編敕癸亥策制舉  
材識兼茂明於體用明州觀察推官夏噩冬十月乙巳遣翰林  
學士胡宿奉帝繪像如契丹王洙侍講邇英至周禮三年大比

帝曰古者選士如此今諸科待試京師恒六七千人率四五年  
一下詔故士有抑而不得進者孰若裁其數而屢舉十二月戊  
申詔自今間歲貢舉解天下進士諸科舊額之半置明經科罷  
說書舉人三年春正月戊戌鑿永通河夏四月丙辰詔部使  
者舉劾守令貪恣昏虐以弛爲寬以苛爲察以增賦歛爲勞以  
出入刑罰爲能自今其各思率職毋撓權倖毋縱有罪以稱朕  
意五月壬申增國子監生員六月丙午韓琦同平章事時建儲  
之議依違不決帝謂韓琦將有就韓琦事韓琦而韓琦琦懷漢書  
孔光傳以進曰成帝無子立弟之子彼中材之主猶能如是况  
陛下乎秋七月丙子廣濟河溢原武縣河決遣官行視民田振  
恤被水害者八月己亥朔日食庚申下溪州蠻彭仕義降九月  
己丑置都水監罷三司河渠司十二月己巳詔三司歲上天下

稅賦之數三成一會虧贏以聞閏月丁丑詔裁定制科及進士  
高第人恩數四年春正月丙申朔日食自去冬丁亥避殿減  
膳辛丑始復又因雨雪不止遣官分行京城賜孤窮老疾錢糴  
縣委令佐爲糜粥濟饑壬寅頒嘉祐驛令二月己巳罷權茶乙  
亥置廣惠倉隸司農寺戊子白虹貫日三月戊戌賜進士諸科  
及第出身三百三十九人癸酉封柴氏後爲崇義公給田十頃  
以奉周祀丙子復銀臺封駁司范鎮除知制誥入謝言建儲陛  
下許臣三年今已及矣夏五月戊戌除舊禁兩制臣僚不許私  
詣執政所舉薦不得用爲御史之例丁丑詔轉運司凡隣州饑  
而輒閉糴者以違制論秋七月丁未放宮女二百三十六人八  
月乙亥策制舉人冬十月壬申勅發景靈官癸酉給于太廟大  
赦詔諸路監司察士有學行爲衆所推者同長吏以聞民父母

年八十以上復其家徵河南處士邵雍稱疾不至十一月庚子  
汝南郡王允讓薨十二月丁丑白虹貫日 五年春正月辛卯  
朔詔鑿二股河三月乙未歲星晝見夏五月己丑京師地震已  
酉王安石上萬言書召爲三司度支判官秋七月癸巳交趾與  
甲峒蠻合兵寇邊都巡檢宋士堯拒戰死之詔發諸州兵討捕  
戊戌歐陽脩上新唐書庚戌詔中書門下采端實之士明進諸  
朝辨激巧僞者放黜之八月壬申詔求逸書蘇洵試校書郎九  
月己丑太白晝見是歲以內外官冗始令臺諫六品諸司五品  
郊任一子者增爲兩郊兩制而上歲任一子者增爲三歲 六  
年春三月己亥賜進士王俊民等二百九十五人夏六月壬子  
朔日食太白及歲星晝見丙子以司馬光知諫院入對言願爲  
宗廟社稷自重卻罷飮宴安養神氣後宮嬪御進見有度左右



小臣賜予有節厚味腊毒無益奉養不宜數御上嘉納之戊寅以王安石知制誥秋七月諸路水溢差官體量蠲稅癸巳詔二省中警臺諫爲耳目之官乃聽險陂之人興造飛語中傷善良非忠孝之行自今百工務敦行實循而弗改者紕之八月策制科三人河南福昌縣簿蘇軾浥池縣簿蘇轍著作郎王介閏月詔課績院以新定條目考校諸路轉運提刑州縣長吏有清白不擾實惠及民者保薦再任政迹尤異加獎掘冬無冰十月壬午定內侍磨勘法壬辰起復皇姪宗實爲秦州防禦使知宗正寺辭不拜十月己巳許夏國用漢衣冠七年春正月辛未復命宗實知宗正寺乙亥詔南郊以太祖配永爲定制二月己卯朔更江西鹽法夏四月壬午頒嘉祐編敕五月戊午太白晝見六月丙子朔歲星晝見秋七月戊申太白經天八月己卯詔告

天地宗廟諸陵立宗實爲皇子賜名曆九月辛亥大饗明堂奉  
眞宗配大赦冬十一月甲戌白虹貫日乙未太白晝見丙申詔  
內藏庫三司共出緡錢一百萬助天下常平倉糶本十二月丙  
申幸龍圖天章閣召羣臣宗室觀祖宗御書又幸寶文閣爲飛  
白書分賜從臣 八年春二月癸未帝不豫皇太后權同聽政  
丙戌二府奏事于福寧殿之西閣三月癸亥御內東門帳殿優  
賜諸軍緡錢甲子御延和殿賜進士許將等三百四十一人辛  
未帝崩于福寧殿年五十四遺制下曰雖深山窮谷莫不奔走  
悲號上尊諡曰神文聖武明孝皇帝廟號仁宗元豐六年加諡  
體天法道極功全德神文聖武睿哲明孝皇帝

冊曰孔著善人孟彭可欲有君如此輝光簡錄百爾具全  
萬事欠足郭雖不終曹有可續天道無知難以意易

氏所俱已  
載弘道錄

弘簡錄卷八十八終

弘簡錄卷八十九

明刑部員外郎仁和邵經邦弘齋學

皇清翰林院侍講學士四世孫遠平校閱

天王 宋一之五

英宗皇帝諱昭太宗曾孫祖商王元份父濮王允讓夢兩龍與  
日並墜以衣承之母仙遊縣君任氏以明道元年正月三日生  
於宣平坊邸第赤光滿室或見黃龍遊光中行第十三四歲仁  
宗取入養於內廷寶元二年皇子生復歸邸第自幼性好讀書  
不爲燕嬉褻慢服御儉素恒若儒者每朝服以見教授曰師也  
敢弗爲禮吳充教吳王宮進宗室六箴明宗付宗正命書之屏  
風以自警皇祐三年賜名宗質授左監門衛率府副率累遷右  
羽林大將軍宜州刺史嘉祐二年轉右衛大將軍岳州團練使

韓琦等議建儲仁宗密謂宗子已有賢智可付者卿等其勿憂時方服濮王喪詔起復以終喪辭奏四上乃聽復申前命又辭立爲皇子改今名仍稱疾堅辭詔同判大宗正事安國公從古等往喻旨責以大義卽臥內起之不得已始受命嚴勅舍人謹守吾舍上卽有嗣吾歸矣以肩輿赴召良賤不滿三十人行李蕭然惟圖書數篋而已入見于清居殿自是日再朝或入侍禁中愼靜恭默無所獻爲天下陰知其有聖德云九月遷齊州防禦使封鉅鹿郡公仁宗崩夏四月壬申朔皇后傳遺詔命嗣皇帝位入哭盡哀尊皇后爲皇太后御東楹見百官癸酉大赦賜百官爵一等優賞諸軍如乾興故事遣王道恭告哀韓贊告卽位于契丹帝欲諒陰三年命韓琦攝冢宰遵遺詔喪服以日易月乃止乙亥見輔臣奏事必問本末然後裁決莫不當理是晚

忽得疾不知人言語失序將大歛增劇不能成禮惟禮官執事羣臣奉慰垂簾不坐己卯請皇太后同聽政壬午服藥櫛居柔儀殿東閣西室皇太后居東室垂簾宰臣各以政事覆奏簾前乙酉作受命寶焚馭自去年八月庚辰不見命宰臣祈禱至是月己丑見于東方庚子立京兆郡君高氏爲皇后五月戊午以富弼爲樞密使戊辰初御延和殿疾猶未平命宰臣禱于天地宗廟社稷岳瀆山川及諸寺觀六月辛卯契丹遣蕭福延等來祭弔蕭素賀卽位秋七月壬子帝疾瘳初御紫宸殿見百官癸亥歲星晝見乙丑星大小數百西流戊辰百官請大行皇帝諡于南郊八月癸巳立生日爲壽聖節九月戊午上仁宗諡冊于福寧殿冬十月甲午葬永昭陵制度務從儉約十一月甲午祔太廟廣爲入室十二月己巳初御邇英閣召呂公著講論語割

敬侍讀史記

治平元年春正月丁酉朔改元戊戌太白晝見己亥壽聖節百  
官及契丹使上壽于紫宸殿三月辛酉雨土夏四月癸未放宮  
女百三十五人甲午旱輔臣韓琦中丞王嚆請上祈雨于相國  
天清寺醴泉觀時帝新愈人心大悅琦日取十數事奏上裁決  
悉當詣東殿覆奏太后亦稱善五月庚戌初御前後殿皇太后  
徹簾還政己未焚惑犯太微上將壬戌命宰臣謝天地宗廟社  
稷及宮觀告帝疾愈進輔臣爵一等六月己亥封皇子頴爲穎  
王額東陽郡王頴鄆國公增置宗室翊善教授丁未增同知大  
宗正事一員辛亥作睦親廣親宅辛酉歲星晝見太白入太微  
垣乙卯遣兵部員外郎呂海章峴等賀契丹主并太后生辰正  
旦丙辰貶內侍都知任守忠秋九月詔日開經筵重陽節當從

講呂公著司馬光言陛下初政清明宜親近儒臣講求治道  
不惜頃刻之暇從之是歲畿內并宋毫陳許汝蔡唐潁曹濮濟  
單濠泗廬壽楚杭宣洪鄂施渝州光化高郵軍俱大水遣使行  
視疏治以上供米振恤獨其賦租二年春二月賜進士彭汝  
勳等三百一十六人三月己巳班明天曆夏四月戊戌詔議崇  
奉漢安懿王典禮丙午景靈宮作孝嚴殿奉安仁宗御容六月  
己酉中書奏追尊之議兩制以爲宜稱皇伯高官大爵極其尊  
榮與執政不合更下尚書集三省御史臺議臺諫爭言不可甲  
寅罷議令有司博求典故以聞務在合經秋八月庚寅京師大  
雨木詔求直言羣臣皆歸咎濮議以爲簡宗廟故水不潤下司  
馬光獨奏今梓宮在殯陛下已失太后之懽心事先帝之委託  
長公主數人不宜屏居閑宮又言知人之賢而不能舉知人不



背而不能去知事之非而不能改知事之是而不能從諫官爲  
天子耳目陛下當察其是非今乃付之大臣彼安肯以已之所  
行爲非而以他人所言爲是乎上是其言親擢范純仁爲殿中  
侍御史呂大防爲監察御史裏行邵必知諫院九月己巳以災  
異策制舉二人范百祿爲秘書丞李清臣著作佐郎并武舉六  
人十一月壬申有事南郊大赦加恩百官上皇太后皇后冊以  
齊州爲興德軍節度是歲大風晝晦白氣起西方太白晝見又  
犯南斗雨水冰以災異罷宴樂遣使禱岳瀆名山 三年春正  
月詔遵皇太后慈訓宜如前代故事濮安懿王可稱親尊爲濮  
安懿皇夫人爲后以塋爲園置守衛吏卽園立廟卽王子孫主  
祠事如皇太后旨辛巳詔臣民咸避王諱以王子宗懿爲濮國  
公黜御史呂誨范純仁呂大防趙鼎趙鼎諫官傅堯俞學士范

鎮侍讀呂公著二月乙酉朔白虹貫日三月庚申彗星晨見于  
室避殿減膳辛巳昏見于昴如太白長丈有五尺壬午字出畢  
如月夏四月詔司馬光編歷代君臣事迹光奏紀傳之體文字  
繁多竊不自揆欲上自戰國下至五代正史之外旁采他書凡  
關國家之盛衰生民之休戚善可爲法惡可爲戒帝王所宜知  
者略依左氏春秋爲編年一書名曰通志其上下貫穿千餘載  
乞命翁源令劉恕太常博士劉攽同修從之夏人寇邊環慶經  
略使蔡挺擊走之秋九月壬子朔日食帝問中書言事者多言  
不進賢何也歐陽修曰往時進士五名以上皆得試館職及第  
不十年至宰輔今第一人兩任方得試第三以下復不得試且  
大臣薦舉不卽召止令候闕有因差遣例除者多年勞老病之  
人所以進賢路狹也帝嘉納之因令琦等舉士得二十人先召

試十人餘須後試冬十月帝不豫引仁考故事兩日一御題英  
閣講讀以安人心丁亥詔禮部三歲一貢舉十一月戊午羣臣  
薦于大慶殿及天地宗廟社稷十二月壬寅立頴王顥爲皇太  
子大赦 四年春正月庚戌朔羣臣上尊號曰體乾曆曆文武  
聖孝皇帝丁巳崩于福慶殿壽三十六遣詔皇太子柩前卽皇  
帝位謚曰憲文肅武宣孝皇帝廟號英宗元豐六年加謚體乾  
應曆隆功盛德憲文肅武曆神宣孝皇帝 帝自居睦親宅以  
孝德著聞事濮王承順顏色備盡子道凡宮中事王委幹之無  
不平允王薨以服御玩物分諸子宗室有假金帶還以贖物不  
辦殿侍鬻犀帶直錢三十萬亡之亦不問卽位命近臣必以官  
不名大臣以爲言帝謂雖宮中命小臣亦未嘗名郊祀習儀有  
郎官醉酒嘔吐爲御史所劾特令放之曰失儀薄罰若以酒食

得過難施面目矣舊制尚帝女皆升行以避舅姑之尊帝謂豈  
可以富貴之故屈人倫長幼之序詔有司革之神宗特述其事  
始命公主行見舅姑禮在位五年未聞失德惜以疾疾不克大  
有所爲昔人有言天之所命人不能違以帝之執心固讓若將  
終身而卒踐帝位豈非天命乎吳奎對神宗以追崇濮王事誠  
牽私意神宗亦歸罪於歐陽修韓琦一時君臣父子之間不能  
無疑何況萬世哉

冊曰治無百年已過其紀子之澤亦當且止天理自然  
人烏得已

### 天王 宋一之六

神宗皇帝諱顓英宗長子母高皇后以慶曆八年四月戊寅生  
于濮王宮祥光照室羣鼠吐五色氣成雲八月賜名仲鍼授奉

府副率遷右千牛衛將軍及長隆準龍顏勳止皆有常慶侍英  
宗入內居寧慶宮嘗夢神人捧之登天卽位授安州觀察使封  
光國公與岐嘉二王同受經于侍講王陶相率拜之天性孝友  
好學讀經史至日晏忘食恒正衣冠拱手雖大暑未嘗用扇九  
月加忠武軍節度使同中書門下平章事封淮陽郡王改今諱  
治平三年三月納夫人向氏卽位改元大赦除常所不原尊皇  
太后曰太皇太后皇后曰皇太后敬奉兩宮侍立終日雖寒暑  
不變中外翕然稱賀壬戌以韓琦爲山陵使凡所須應委三司  
運使計畫毋輒擾民丙寅羣臣表三上始御迎陽門聽政  
貶侍疾內醫命提舉醫官試堪診御脉者六人加東平郡王允  
弼襄陽郡王允良並守太保進封弟顯昌王頴樂安郡王不許  
解官行服文武大臣進秩有差二月乙酉初御紫宸殿立向氏

爲皇后遣馮行已于遼告哀孫坦告卽位詔賜夏涼祚吻斷羅  
進李日尊南平王加董璫檢校太保庚寅立生日爲同天節辛  
卯白虹貫日三月壬子賜進士許安世等四百六十一人癸亥  
詔入內內侍省官已經壽聖節任子者同天節權罷奏爲閏月  
癸未太白晝見詔齊密登華邪耀鄜絳潤發海宿饒歛吉建汀  
潮等十八州知州慶渭秦延四州通判並從中書遷任母以恩  
例奏授庚子求直言內外所上封事令張方平司馬光戶部郎  
中趙抃刑部郎中陳薦同詳定以聞從中丞王陶請舉知縣資  
序人入爲御史裏行帝在東宮聞王安石名癸卯出知江寧府  
乙巳詔以孟夏農勞之時令監司戒飭州縣省事勸民有艱食  
者振之夏四月庚戌請大行謚于南郊五月辛巳久旱命宰臣  
禱雨乙巳寶文閣成置學士直學士待制等官秋七月壬辰上

寶冊于福寧殿八月丁未朔太白晝見己巳京師及潮建涼泉  
邵武地震癸酉葬永厚陵九月壬午祧僖祖及文懿皇后乙酉  
祔英宗神主于太廟樂曰大英之舞獨山陵民役者賦戊戌以  
王安石爲翰林學士羣臣請上尊號上小心謙抑不受亦不治  
宮室不事遊幸冬十月己酉初御邇英閣召侍臣講讀經史以  
滕甫權御史中丞考諸路監司課績令考課院詳定諸州所上  
縣令治狀甲寅光修通志戊賜名資治通鑑帝親製序文以賜  
帝初志殄滅蠻武十一月癸酉知青澗城种諤襲破夏監軍嵬  
名山收復綏州西方用兵咸始于此十二月壬戌詔起居日增  
轉對官二人是歲遼遣蕭餘慶弔祭耶律好謀賀卽位蕭傑賀  
正旦遣孫思恭等報謝兼賀生辰正旦

熙寧元年春正月甲戌朔日食自去冬乙丑遯殿減膳命宰臣

公亮等極言闕失論者謂熙寧初政乃天人交感之會一代消  
長之機由此而上五朝全盛由此而下宋祚以衰正陽虧於元  
旦蓋先兆云丁酉詔修英宗實錄二月乙卯孔若蒙襲封衍聖  
公三月庚辰夏諒祚死于乘常立時帝屬精政事將大有爲或  
曰朕不食兩宮使人趣之答曰朕非喜勞惡逸誠以享天下之  
奉欲用此勤報之也每憤狄人倔强慨然有恢復幽燕之志思  
以雪歷代讐恥夏四月乙巳詔安石越次入封初洛陽邵雍聞  
杜鵑鳴于天津橋嘆曰天下將亂地氣自南而北禽鳥得氣之  
先者也自此而後必用南人爲相以亂天下辛亥同天節羣臣  
及遣使上壽于紫宸殿秋九月辛未帝念創業垂統實自太祖  
顧無以報稱詔封曾孫舒國公從式爲安定郡王世世勿絕冬  
十一月癸酉太白晝見丁亥郊執政以用度不足乞勿賜金帛



命學士王珪安石與光同議因爭論不已帝曰朕意與光同然姑以不允答之羣臣復請上尊號光亦諫止時河決瓌強恩縣京及河朔冀瀛莫等州地連震有聲如雷遣官沿邊安撫候遣人勸息以聞減獄囚罪賜溺與壓死者緡錢給河北安撫司廊延路轉運司空名誥募民入粟實邊十二月夏人以塞門安遠二砦來易綏州帝從安石謀用王韶管幹秦鳳經略司機宜文字 二年春正月甲午奉安英宗神御于景靈宮英德殿二月己亥富弼復相庚子王安石參知政事安石建言周置泉府之官以抑制兼并均濟貧乏變通天下之財後世惟桑弘羊劉晏相合此意學者不能推明先王法意更以爲人主不當與民爭利今欲理財當先求泉府之法以收利權帝納其說乃議行青苗均輸保甲免役市易保馬方田及免行錢農田水利茶鹽

便糴通號新法創制置三司條例司命安石升之並領其事安石恐帝意不堅復奏人才難得亦難知堯與羣臣共擇一人治水尚不能無敗事今使十人理財其中容有一二敗事則異論乘之而起要當計利害多少不爲異論所惑帝以先入之言爲主故終始行之斷然不疑三月薦呂惠卿爲校詳文字章惇爲三司條例官曾布檢正中書五房凡有奏請朝臣以爲不便布必上疏條析以堅帝意奸人用事遂不能止詔遣劉焄等四十輩分行天下察農田水利賦役及頒約束夏四月羣臣復請上尊號時方旱帝避殿減膳不許安石進言天變會不足畏御殿復膳如初由是大小臣工攻之者衆安石求去帝留之視事如故五月壬戌太白晝見秋七月己丑韓琦上仁宗實錄曾公亮上英宗實錄八月戊申河徙東行時北口已塞自其南四十里

許家港東決汎溢大名恩德治永靜五州軍境辛酉權監察御史裏行程頴上章論王霸略以爲誠心而王則王假之而霸則伯得天理之正極人倫之至堯舜之道也用其私心竊仁義之偏霸者之事也王道坦然本乎人情出乎禮義若履大道而行無復邪曲霸者崎嶇反側于曲徑之中卒不可入堯舜之道帝不納九月行青苗法出內庫緡錢百萬及部內常平廣惠錢穀給民願借者總計諸路錢米千五百萬以上冬十月丙申陳升之入相代以韓絳制置三司條例司戊戌郭遠城綏州號綏德城賜嵬名山姓名趙懷順以爲供備庫使十一月壬午御選英閣聽講閏月庚子濟御河壬子置河東交子務于潞州三年春正月羣臣爭論新法安石稱疾不出帝諭執政首罷青苗連日不決安石因求去詔惠卿諭旨復起持論益堅三月丙申正

言李常孫覺中丞呂公著裏行張戢程顥王子韶知雜陳襄皆  
上疏不聽咸貶黜之數日之間臺諫一空上子上親策試賜奏  
名進士明經及第葉祖洽等八百二十九人丙辰立試刑法及  
詐刑官夏四月癸亥幸金明池觀水嬉宴射瓊林院五月癸巳  
太白晝見甲辰詔罷制置三司條例以其事歸中書安石稱疾  
不朝詔諭之復起視事丁巳詔以審官院爲東院別置西院六  
月丁丑詔擇宗室秦魯蔡魏燕陳越七王後世世封公以奉宣  
祖太祖太宗之祀秋七月賜進士蘇丕號安退處士八月己卯  
夏人犯大順城鈐轄郭慶都監高敏死之命韓絳宜撫陝西河  
東九月戊子朔置中書檢正司己亥始試法官乙巳親策賢良  
方正及武舉黜孔文仲壬子太白復見冬十月壬申朝謁神御  
殿十一月壬子振河北饑民徙京西者己丑官節行之士二十

一人癸卯授布衣王存下班屢侍十二月己未詔立諸路更戌法遣還舊時他路兵雜戊乙丑保甲法行以王拱辰言得免下戶丁卯賜布衣陳知彥進士出身知縣王輔同進士出身庚午夏人寇鎮戎軍巡檢趙普伏兵邀擊敗之戊寅初行免役法其坊郭及未成丁單丁女戶寺觀官品之家舊無身役亦令出錢名助役錢凡數錢視州縣應用僱直已足仍率其數增取二分以備水旱名寬剩錢 四年春正月鬻天下廣惠倉田爲三路及京東常平倉本廣惠者仁宗用薛琦言舉絕戶業置倉以給老稚貧疾不能存者至是咸廢丁酉朝謁太祖太宗神御殿庚子幸集禧觀宴從臣又幸大相國寺御宣德門觀燈二月更定科舉法廢春秋儀禮罷詩賦及明經諸科專以經義論策試進士給諸州學田增置學官戊辰詔振河北饑賑恤西界戰死軍

人丁丑禱雨三月慶州廣銳卒叛尋討平之庚寅詔給諸路學  
田增敎官員辛丑錄唐李氏後夏四月丙辰朔恤刑丙子遣使  
視宿亳等州災傷仍令修飭武備五月壬子蠲恩冀等州夏稅  
六月庚子羣臣三上尊號不許丙寅慮囚秋七月戊子屠擅國  
來貢甲午賑恤兩浙水旱乙未錄死事將校卹建子遇爲三班  
奉職丁未詔唐鄧給流民田八月遣察訪使徧行諸路治吏沮  
青苗法及奉行不謹者癸酉議取河湟置洮河安撫司命王詔  
主之九月丙戌河決鄆州辛卯大饗明堂以英宗配大赦天下  
內外官進秩有差冬十月募民醫坊塲河渡戊戌立太學三舍  
法初入外舍不限員次升內舍二百員又升上舍一百員員各  
治一經十二月乙亥崇義公柴詠致仕子若訥襲封是歲韓絳  
使种諤襲敗夏人于囉兀遂城之夏人日聚兵爲報復計諤復

領兵入西界斬獲甚衆夏復寇撫寧堡陷之五年春正月置  
京城邏卒察小民怨謗及議時政者收罪之二月募民興水利  
三月甲午李日尊卒于乾德嗣遣使弔祭丙午京師置市易務  
以呂嘉問爲提舉凡諸軍上供之物悉令計直出內庫錢市以  
給用尋改爲都提舉市易司以秦鳳兩浙黔廣鄆成都六市易  
隸焉夏四月命內侍李憲爲河北沿邊安撫使辛未塞北京決  
河五月詔宗室非袒免親者許應舉辛巳建古渭砦爲安遠軍  
命詔兼知軍事庚寅以背唐大首領俞龍珂爲供奉官賜姓名  
包順壬辰諭辟田疏水功加賜趙尚寬等秩以勸天下丙午行  
保馬法先於開封府界無過三千匹陝西五路無過五千匹其  
後遂徧行諸路時朝廷大小政務皆安石主之六月上因其求  
去諭以自古君臣如卿與朕相知極少朕方以卿爲師冀開鄙

純無乃疑朕有他安石責帝凡事未能照竊而斷以義羣臣敢  
爲吹說至有含糊不肯窮究到底之說帝咸優容之秋七月初  
以文臣兼樞密都承旨閏月庚戌遣章惇察訪荆湖北路自國  
初北江彭氏并江舒氏并田氏向氏皆受朝命隸辰州入貢及  
是皆令納土開耕山置安化縣辦城砦比之內地八月甲申王  
韶敗西蕃木征于鞏令城遂復武勝軍改名鎮洮命司農顏方  
田均稅法以鉅野縣王莼爲指教官先自京東路行之諸路倣  
焉冬十月升鎮洮軍爲熙州置熙河路節度以王韶領之十一  
月癸丑河州首領瞎藥等來降以爲內殿崇班賜姓名包約王  
申分陝西爲永興秦鳳等六路置經略司十二月帝諭宰臣本  
朝祖宗有言但爲天下守財不敢妄費安石對曰人主若能以  
堯舜之政澤民雖竭天下之力以奉養與不爲過守財之言非



天下正理不可爲法帝聽之是歲太白晝見者二兩土少華山崩六年春正月辛亥復舊廟爲始祖以配威生帝祧順祖于夾室二月辛卯夏人寇秦州都巡檢使劉惟吉敗之丙申王韶復河州獲木征妻子三月己酉詔贈熙河死事將田玘禮賓使錄其子三人孫一人庚戌置經義局訓詩書周禮命安石提舉雋與惠卿同修撰壬戌賜進士金忠等四百人庚午封李乾德交趾郡王夏四月甲戌朔日食不見初置律學設教授四員詔曰士之蒞官以法從事今所習非所學其令命官舉人生員皆得入學講習律令又置疏浚黃河司以范子淵爲都大提舉五月播州楊貴遷遣子光震來貢命爲三班奉職瀘州龔羅宴叛遣中書檢正官熊本爲梓夔路訪察使六月己亥置軍器監以惠卿判監事帝納王雱之說天下甲冑弓弩無一堅利遂更其

法以數州所作聚而爲一擇工其事者爲正郎使典其藏秋七月丙午大食陀婆離來貢乙丑分河北爲東西二路丙寅夜西北有聲如磬九月辛亥策武舉丙寅太白犯斗戊辰霽雨詔決滯獄冬十月辛巳王韶復洮岷壘宕四城帝御紫宸殿受賀甲申朝獻景靈宮收免行錢壬辰行折二錢除在京府外諸路並通行十一月癸丑中太一宮成帝親祀之是歲不雨諸路蝗令民間大名直河七年春正月甲子熊本奏討降盜帝大喜自是向意西南用兵不已二月置三司會計司以韓絳提舉令歲會天下財用出入之數以聞帝方圖開邊每以財用不給日夕講求利端公私交困是月景思立與青宜結鬼章戰于踏白城敗死賊遂圍河州復寇岷州高遵裕遣包順等擊走之三月乙巳白虹貫日丙辰遼遣林牙蕭禧來言河東路沿邊增修戍

壘起舖舍侵入蔚應朔三州界內乞行毀徹別立界至帝面諭遣太常少卿劉忱與北朝官卽境上議之自去秋七月不雨至千夏四月河東北陝西饑民流入京城帝感鄭俠言命罷新法越三日果大雨惠卿鄧綰環泣帝前言陛下數年以來忘寢與食成此美政天下方被其賜一旦因狂夫之言罷廢殆盡誠可痛惜帝不忍違復一切如故丙戌又因太皇太后及岐王顯言罷安石以韓絳同平章事呂惠卿參知政事遂立手實法五月初榷蜀茶癸卯大雨雹乙丑大雨水壞陝與平陸二縣六月丁亥太常丞沈括作渾儀浮漏成王韶以木征赴闕賜姓名趙思忠九月章惇爲三司使壬子三司火癸丑置京畿河北京東西路三十七將十一月己未郊赦天下八年春二月癸酉復相安石乙酉初行河北戶馬法三月戊戌從知河州鮮于師中奏

置諸學教蕃酋子弟賜田十頃歲給錢千緡增解進士一人庚  
子遣人復來議疆事詔遣知制誥沈括報之戊午太白晝見閏  
四月壬寅沈括上奉元曆五月甲子分秦鳳環慶兵各爲四將  
丁丑雨土及黃毛六月安石上三經新義詔頒于學宮秋七月  
戊寅太白晝見戊子分涇原兵爲五將遣使爭議疆事不決安  
石勸帝將欲取之必姑與之乃詔于分水嶺爲界東西失地七  
百里遂爲異日興兵之端八月庚寅朔日當食不見庚戌韓絳  
免罷三司會計司丁巳大閱冬十月乙未彗星出軫詔求直言  
罷手實法丁未彗不見御殿復膳十一月戊寅交趾陷欽與廉  
州安石薦趙鼎爲安南道招討使內侍李憲副之十二月甲寅  
熙河路木宗城首領結彪謀叛熟羌日脚族青廝八斬其首來  
獻補下班殿侍 九年春正月戊辰交趾再陷邕州知州蘇緘

死之巳卯下溪州刺史彭師晏及天賜州來降五溪悉平遂城  
下溪改名會溪城二月戊子詔李憲還以郭達爲安南招討使  
趙高副之詔占城占臘合擊交趾乙丑吐蕃宗哥首領鬼章寇  
五牟谷蕃將蒲訛訥支邀擊大破之三月甲戌賜進士徐鐸等  
四百二十人復試律義斷案罰考官陳鐸等鬼章復寇五牟谷  
黑河令轄韓存寶敗之夏四月戊戌復廣濟河漕辛亥茂州夸  
寇遣內侍王中正經制遂城茂州綿州都監王慶崔昭用劉  
珪左侍禁張乂戰死五月丙寅分兩浙東西路庚辰靜州下首  
領董瑩白等來降六月癸卯以水源等洞蠻主儂賀等七人爲  
將軍秋七月靜州將楊文緒結蕃部謀叛斬之以徇八月甲申  
朔齊州監務左班殿直孫紀死賊錄其一子爲三班借職巳丑  
罷鬻祠廟錢九月戊午濬汴河冬十月乙酉大白晝見丙午上

意狀安石始罷其任以吳充王珪並同平章事十一月己卯包順等破鬼章兵于多移谷壬午復寇岷州种諤等收之于鐵城置鐵城堡十二月庚戌詔置威戎軍十年春正月己巳白虹貫日二月辛卯日中有黑子丙午以復廣源蘇茂等州羣臣表賀改廣源爲順州己酉赦李乾德并廣南東路荆湖南路繫囚餘各降一等徒以下釋之夏四月辛巳復置憲州甲戌太白晝見秋七月丙子河決澶州曹村埽癸酉立義倉甲戌初封安懿王子宗樸爲濮陽郡王冬十月薨弟宗誼襲封奉祀十一月庚午以西蕃首領青宜結鬼章爲廓州刺史阿令骨爲松州刺史甲戌郊大赦改元

元豐元年春閏正月辛巳呂公著兼端明殿學士時帝臨御日久羣臣畏上威嚴莫敢進規公著獨上疏言帝繼嗣未廣近日

數起詔獄有司酷于鍛鍊願親正士拒壬人必有忍以濟事功  
推恕心以及人物崇起忠厚保合太和帝覽奏以爲深得人臣  
盡規之義壬辰思孫固先兄議論新法擢同知樞密院事三月  
御邇英閣沈季長進講周禮八法夏四月癸亥太白晝見戊辰  
塞曹村決河名其埽曰蠶平以功遷太常博士苗師中等各一  
官六月癸卯朔日食秋七月瀘州納溪蠻入寇命韓存寶經制  
遂破之九月癸酉交趾來貢李乾德表乞還廣源等州詔不許  
冬十月錄死事侍禁件全弟宣爲三班借職是歲武康軍梁縣  
嘉禾生河中府夔州甘露降日中有黑子凡十二日河北及濱  
棣滄青齊淄等州水詔禦備蠲租給流民食以常平糧貸之  
二年春正月壬午以容州管內觀察使上桂國南陽郡開國公  
楊遂爲寧遠軍節度使甲午詔十哲從祀孔子廟庭三月壬午

賜進士時彥等三百四十人夏四月甲子詔增審刑院詳議詳  
斷官有失入人罪者具數罰之罷刑部檢法官五月庚辰詔仍  
濮安懿王三夫人並稱王夫人六月甲辰廣西捕僞智春執其  
妻子以獻戊申命蔡確參定編修傳法寶錄秋八月甲申朔夏  
人寇援德城都監李浦敗之辛丑分涇原路兵爲十一將甲寅  
增太學生舍置八十齋齋三十人外舍生二千人內舍生三百  
人月一私試歲一公試補內舍生間歲試補上舍生如定制增  
歲賜錢六千緡冬十月立水居戶五戶至十戶爲一甲以輸賦  
役戊申交趾歸所掠民詔以順州賜之己酉太皇太后疾上不  
視事命輔臣禱于天地宗廟社稷減天下囚死罪一等流以下  
降之乙卯崩命王珪爲山陵使羣臣七上表始聽政丁亥雨土  
十二月乙巳中丞李定上國子監敕式令并學令凡百四十條



是歲頴壽瓊桂四州并南康軍甘露降陳與河陽全州芝草生  
眉州瑞竹曹州瑞穀各來上忠州與南賓縣雨莛 三年春正  
月乙丑朔不視朝癸酉陞許州爲頴昌府戊寅上太皇太后諡  
癸巳白虹貫日二月丙辰始御崇政殿視朝夏四月庚申復置  
御史六察以糾劾多寡爲殿最任滿取旨升黜六月甲午日有  
五色雲帝欲釐正官制命館閣校唐六典置局中書令學士張  
瑄等詳定以三省侍中中書令尚書令官高不除以尚書左僕  
射兼門下侍郎行侍中之職右僕射兼中書侍郎行中書令之  
職廢參知政事置門下中書二侍郎尚書左右丞以代其任罷  
中書門下平章事及判門下省事議者因欲廢審院歸于兵部  
帝謂祖宗特置互相維持遂止秋七月庚午河決澶州詔李立  
之自大名至于瀛州築堤捍之癸未葬出太微垣凡三十六日

而沒帝避殿減膳詔求直言戊子太白晝見八月下詔肇新官制凡省臺寺監領空名者一切罷去易以階官以開府儀同三司易使相兼侍中節度使平章事以特進易左右僕射以紫金光祿大夫易吏部尚書銀青光祿大夫易五曹尚書光祿大夫易左右丞正議大夫易六曹侍郎通議大夫易給事中中大夫易左右諫議中大夫易秘書監中散大夫易光祿卿至少府監朝議大夫易太常卿少卿左右司郎中朝請朝散朝奉大夫易前中後三行郎中朝請郎易前行員外郎侍御史朝散郎易中行員外郎起居舍人朝奉郎易後行員外郎左右司諫承議郎易左右正言太常國子博士奉議郎易太常秘書丞著作郎以通直郎易太子中允贊善大夫洗馬著作佐郎大理寺丞以宣義郎易光祿衛尉寺將作監丞承事郎易大理評事承奉郎

易太祝奉禮丞務郎易校書郎正字將作監簿定爲二十四階  
九月定百官寄祿格視官品之高下爲準分行守試三等高一  
品以上爲行下一品爲守下二品爲試品同者不用辛巳大饗  
明堂禮成卽用新制遷王珪尚書左僕射兼門下侍郎蔡確尚  
書右僕射兼中書侍郎章惇門下侍郎張璪中書侍郎蒲宗孟  
尚書左丞王安禮尚書右丞王安石特進改封荊國公馮京爲  
樞密使薛向孫固並爲副使向尋免以呂公著代之十一月己  
丑朔日當食雲陰不見是歲青州臨朐益都石化爲麴安州臨  
江軍產芝及連理麥 四年春正月庚子詔試進士加律義二  
月己卯分東南團結諸軍爲十三將三月乙巳命官閱九軍營  
陣法於京城戊申大閱夏四月帝御延和殿閱試保甲民兵合  
七百一十八萬有奇立團教法以大保長教保丁月給錢三千

日給食官與器械已已詔罷南郊會祭天地自今親祀北郊如  
南郊儀有故不行則以上公攝事乙酉河決澶州小吳埽秋七  
月己丑太白晝見帝信俞充言詔經制李憲等與師問罪于夏  
孫固呂公著諫不聽時分五路並進憲出熙河誘出鄜延邊格  
出環慶劉昌祚出涇原王中正出河東四將之師皆潰憲竟不  
至夏人來追帝始悔不用固等之言八月己酉詔大理卿崔台  
符同吏部議選格帝必欲公天下而貽永久乃更定選格以銓  
注之法悉歸選部罷審官東西院爲尚書左右選罷流內銓三  
班院爲侍郎左右選於是吏部始有四選之法文臣寄祿官自  
朝議大夫職事官自大理正以下非中書教授者歸尚書左選  
武臣升朝官自皇城使職事官自金吾街仗司以下非密院宣  
授者歸尚書右選自初仕至州縣幕職官歸侍郎左選自借差

監當至供奉官軍使歸侍郎右選凡選人階官爲七等罷中書  
堂選百司郡縣奏舉悉歸有司備見選舉志九月戊申太白犯  
斗十一月癸未朔日食十二月辛未林廣破瀘蠻乞弟于納江  
俄命班師是歲蝗 五年春正月己亥白虹貫日辛亥再誡西  
討復以憲爲涇原熙河蘭會安撫制置使李浩權安撫副使謗  
知渭州二月封董德爲武威郡王三月乙巳賜進士黃裳等千  
四百二十八人夏四月壬子朔日食不見癸酉詔以五月朔行  
官制頒三省樞密六曹條制事無大小並中書取旨門下覆奏  
尚書施行戊寅知延州沈括請城永樂六月甲寅王珪上兩朝  
史戊午詔修兩朝實訓秋七月己酉始建雪壇祀上帝以太宗  
配時先朝御容多寓寺觀帝命總作十一殿于景靈宮凡神御  
皆迎入仍于兩廡圖累朝文武功臣凡執政以上官除拜赴宮

恭謝八月詔歲以四孟月朝獻並如太廟九月丁亥夏聚三十萬圍永樂乙未詔李憲張世矩等將兵赴救戊戌城陷徐禧李舜舉李稷皆死帝聞大慟爲之不食是月遂感疾自用兵以來凡得夏葭蘆吳堡義合米脂浮圖塞門六砦敗死官軍熟羌義保六十餘萬錢穀銀絹以萬數者不可勝計帝始知邊臣不可倚信深自咎悔曲贈諸死者官而貶括珍等自是無意於西伐矣冬十月安化蠻寇宜州知州王奇死之詔贈忠州防禦使是歲河決原武滑州并洛口廣武大河水溢六年春正月丁丑朔御大慶殿受朝始用劉几所製新樂及更造輿衛器仗冠服鸞儀司徹幕屋壞毀玉輅甲申白虹貫日二月丁未夏人攻蘭州知州李浩因之鈐轄王文郁率死士擊走之貶憲爲總管進文郁西上關門使浩四方館使夏四月甲子禮部郎中林希上

兩朝寶訓壬申御邇英閣聽蔡卞講周禮閏六月夏主秉常復上表請修貢乞還舊疆許之時河東將薛義敗之于葭蘆西嶺麟府將郭忠詔等敗之于也離抑部河東將高永翼敗之于真鄉流部李浩敗之于巴義谿再寇蘭州右侍禁韋定死之寇麟州知州皆虎敗之戊寅詔陝西河東毋輒出兵秋七月癸卯詔賜資州孝子支漸粟并布帛八月己卯太白晝見九月癸卯朔日食十一月甲辰朝獻景靈宮乙巳享太廟丙午專祀昊天上帝于闐丘赦天下十二月戶部上今歲民數天下凡二十三路東南際海西盡巴夔北極三關東西六千四百八十五里南北萬一千六百二十里天下主客戶一千七百二十萬一千七百一十五 七年春正月丙午復封太祖後世準爲安定郡王夏四月丁丑饒州童子朱天錫朱天申對于睿思殿賜五經出身

五月丙戌封孟軻爲鄒國公配食文宣王荀况楊雄韓愈爲伯  
並從祀秋七月甲辰伊洛溢河決元城冬十月戊子詔分盡交  
趾界以六縣二峒賜之十一月甲辰秉常遣使來貢乙卯太白  
晝見十二月戊辰司馬光上資治通鑑降詔獎諭是歲白虹貫  
日者二河東饑河北水壞洺州廬舍燬其稅八年春正月戊  
戌帝不豫赦天下命輔臣禱景靈宮分遣羣臣禱于天地宗廟  
社稷二月癸巳上疾甚遷御福寧殿三月甲午朔命吏部尚書  
曾孝寬爲冊禮使立延安郡王傭爲皇太子乙未遣官告于天  
地宗廟社稷諸陵戊戌崩遣詔皇太子卽皇帝位太皇太后高  
氏權同處分軍國事在位十九年壽三十八諡曰英文烈武聖  
孝皇帝廟號神宗紹聖二年加諡紹元法古運德建功八字崇  
寧三年更諡體元顯道帝德王功英文烈武欽仁聖孝皇帝



冊曰亂非無本亡不自致衛鞅一入妖反爲瑞所以大賢  
何必曰利傷哉汴宋舉目將異